



Republic of Zambia
Ministry of Education

LITILICA MU CIBEMBA
ICITABO ICAKUBOMFYA KAFUNDISHA
FOMU 1 - TEMU 1



Developed by the Curriculum Development Centre

Lusaka

2025

© Curriculum Development Centre, 2025

Insambu shonse ishapali ici citabo shaba Curriculum Development Centre. Tapali icipande ica ici citabo icingabomfiwa munshila iishasuminishiwa ukwabula ukupoka insambu kubeene bacitabo.

Bakaleemba:

Francis Lubunda: Specialist - Curriculum Development (Icibemba), Curriculum Development Centre, Lusaka.

Gabriel Simungala: Lecturer – University of Zambia, Lusaka.

Richard Chikoye: Lecturer – Kasama College of Education, Kasama.

Charles Mutale: Headteacher – Kawambwa Central Secondary School, Kawambwa.

Davies Mwewa: Headteacher – Lukanda Primary School, Kapiri Mposhi.

Norah Nampasa: Teacher – Kasama Boys Secondary School, Kasama.

Charity Pule: Teacher – Musenga Combined Secondary School, Chingola.

ISHIWI LYANTANSHI

Ukutendeka kwakupilibula nokubomfya ubutantiko bupya ubwa masambililo ayalekomaila pamusambi ukwishiba ifyakubomba imilimo (Competence-Based Curriculum) kubeleleko ukukansha abasambi pakuti beshibishe imilimo iilefwaikwa munkulo iyandakai.

Ubusalo bwa aya masamililo ayapya ayakwishibisha ifyakubomba imilimo yali munshila nangula mulutampulo lwakupilibula nokupakamisha amasambililo ukullosha kumilimo abasambi bafwile ukwishiba.

Iciputulwa ca masambililo cili icayangwa kumafya ayengatumbukamo ilyo lyonse kwaba ukupilibula imipekanishishe yamasambililo. Kanshi cili icaipelesha ukupekanya ifisolobelo ifyakubomfya pakufunda nokusambilila mukutungilila imifundile yabasambi mucaalo conse.

Ici icitabo cakubomfya pakufunda Icibemba capangwa ukukonka na imipekanishishe ya basambi iipya iyakukonkomesha nganshi pakubakansha mukwishibisha ifyakubomba imilimo ukupitila mukushininkisha ukuti amasambililo yabasambi nayalolenkana nemilimo iilekabilwa ukubombwa mucaalo. Iyi mipekanishishe yamasambililo ya 2023 Zambia Curriculum Framewrk ilekomaila pafyo abasambi balingile ukwishiba ifili pamo nga ukubombela pamo, ukutontonkanya mukushika, ukucenjela mufyakupanga-panga na amaano yacifyalilwa, inshila shakupwishamo amafya, ukwishiba nokutontonkanya ifyakusobolola imilandu, ukuibaka mu maano, ukwishiba ukubomfya kompyuta mukulemba nokubelenga elyo nokwishiba ifyakucita amakwebo yakuisungilamo.

Imitwe yamasambililo, imitwe inoono, nokutendeka ukubomfya iyi nshila yamasabililo ikabila ukukomaila pakwishiba ifyakubomba imilimo iyalekana-lekana elyo nokuipelesha pamaka mumibombele.

Kanshi ndi nesubilo ilyakuti iyi mipekanishishe yamasambililo ili nokwafwilisha apakalamba ukupitila mukubimbamo abasambi bonse muno caalo ca Zambia.

Ici citabo cilelanga ukupelesha ukwaba pa ciputulwa ca masambililo pakuti ubu bupilibulo bwa masambililo bube ubwayanguka kuli bakafundisha, ukupitila mukubalangilila bwini-bwino ifyakufunda, ukulondolola mukwanguka imilimo nangula ifyakucita elyo nenshila shakweseshamo abasambi ishalekana-lekana mu mipekanishishe ipya iya masambililo. Leelo nangula cingaba ifi, bakafundisha bali abasuminishiwa nokucincishiwa ukulundamo imilimo iyo bengamona iyakwafwa abasambi ukulingana nefyo bengafwailisha ukupitila mufyo baasambilila, mukucincila, nokusalapuka kwabo pakuti bakwanisha ukubiikamo imilimo imo-imo iishili muli ici citabo leelo ilemoneka ukukabilwa panshita balefunda abasambi mu ncende shabo.

Ici citabo cakubomfya pakufunda Icibemba capekanishiwa mukupeela bakafundisha ifisolobelo nokubalangilila inshila shakufundilamo Litalica mu Cibemba kubasambi abali mu Fomu1.

Amasambililo yamu Fomu 1 aya Litalica mu Cibemba yapekanishiwa ukupitila mukubebeta, ukupitulukamo ukwa mipekanishishe ya masambililo yamu 2023 ukwacitilwe neciputulwa ca masambililo. Uyu mulimo wakupitulukamo waletelwe pamilandu iyingi nencenshi ishingisho ishakabiile nganshi ukupilibula amasambililo ukufuma mufyo abasambi baleshiba: Outcome-Based Curriculum (OBC) ukuya kunshila iipya iyakukansha abasambi ukwishiba ifyakubomba imilimo: Competence-Based Curriculum (CBC).

Uku kupituluka mu masambililo nakabili kwabeleleko pamulandu wakufwaya inshila yakukana peelafye abaana amano yakwishibafye ifuntu epela leelo ukubapeela na ubwishibilo pafyo bacindikakisha, ukukwata imbela iyisuma nokwishiba ifyakubomba imilimo iyo bengalabomba namubuumi bwabo ilyo bapwisha amasukulu yabo nangula ilyo bapwisha amasambilil yabo.

Joel Kamoko (Mr.)

Permanent Secretary – Educational Services

MINISTRY OF EDUCATION

UKUTASHA

Ici citabo cakubomfya pakukafunda Litalica mu Cibemba mu Fomu 1 catumbuka mukubimbamo nokubombesha apakalamba ukwa bantu abengi aba muciputulwa ca masambililo elyo nabambi abashaba muli ici ciputulwa. Kwali ukufwailisha nikwipushanya apakalamba kutubungwe twamu caalo utwalekana-lekana na kubantu abalekana-lekana pakwishiba itontonkanyo lyabo palubali lwa ubu bupilibulo bwa masambililo ukulolekesha pa masambililo yakale elyo nemipekanishishe ya ndakai.

Iciputulwa ca masambililo ciletasha apakalamba bonse abasendelemo ulubali muli uyu mulimo pamilangwe yabo iyo babiikilemo mukupanga ici citabo ca mifundile ya Litalica mu Cibemba kubasambi abali mu Fomu 1.

Namukulekelesha ndepeela ukutasha nganshi kubabomfi bonse abaku ciputulwa ca Curriculum Development Centre pakuipelesha kwabo konse mukulemba ici citabo upekanya, elyo nokupwishishisha ubutantiko bupya ubwa aya masambililo.

Charles K. Ndakala (Dr.)

Director Curriculum Development

MINISTRY OF EDUCATION

IFILI MUCITABO

1. Ishiwi Lyantanshi	4
2. Ukutasha	7
3. Intendekelo	11
4. Ifyo Icitabo Cifwile Ukubomfiwa	12
5. Inshila Yamifundile	14
6. Ifilekabilwa Ukwishiba	15
7. Intendekelo Yacisambililo CaLililica	17
8. Imisango YaLililica	29
9. Imilimo Litica Ibomba	39
10. Lililica Yakulandafye	54

AMASHIWI YAMO-YAMO AYABOMFIWA MUCITABO

Amabumba – fintu ifyalingana ifibikilwe pamo

Iciunda – icongo ico icifuma mukulanda, mukulisha ing'oma nangu
icintu icapala akapyelele

Ifisolobelo – ifintu ifyo babomfya pakubomba umulimo umo

Ifikomo – ifintu fimofimo ifibomba nga inceshi mu milandu atemwa mu
lyaashi

Imbeela – umusango wakucitilamo ifintu atemwa ifyo icintu caba

Intambi – ifishilano fya mutundu ifilanga ifyo umutundu wasuminamo

Ing'omba – mushika wa nyimbo makamaka uwimbila imfumu.

Ipinda – insoselo iyakwata ubupilibulo ubwashika.

Lembalemba – akapepala akanakanaka atemwa akalesha kabuta
kalya kapangwa kuli tandabube ako babika ku moondo atemwa ku
mutolilo pakuti ulefumya iciunda cayana.

Ukubebeta – ukufwailisha ifintu fimo makamaka pakufwaya ubupilibulo
bwacintu.

Ukulengulula – ukufwailisha icinshinka

Ukusobolola – ukubika ifintu umo filingile ukuba

Ukutumbula – Ukusosa icili ku mutima

Umoondo – cimuti icafukulwa mukati elyo batula utupunda apo bakakatika lembalembe pakuti cilelila nga ing'oma

Umupukumo – inyimbo shansansa isho abantu beemba ngabali pa maliila atemwa iyo balenwa ubwalwa.

Umushimpo – cimuti icabaswa icakulishishako ing'oma atemwa umoondo.

Litilica iyakulandafye- iyo mucigeleshiu iitwa nga Oral literature

Litilica iyalembwa- iyo mucingeleshi iitwa nga Written literature

INTENDEKELO

Ici citabo icakubomfya pakufunda Litalica mu Cibemba mu Fomu 1 capangiilwe ukwafwilisha ukupekanya nokufunda amasambililo ukukonka nemipekanishe ipya iya masambililo iyamu 2024 iyasuminishiwa neciputulwa ca masambililo. Nakuba ici citabo cili pakwimininako ifitabo ifyalekana-lekana ifyakubomfya pakufunda ifyo ifishilalembwa pali kano kashita elyo nokwafwilisha bakafundisha mukubalangilila imilimo iyo abasambi balingile ukucita elyo na ifyakwasha abasambi ukulingana nefyo balekabila pamushinku bafikilepo.

Iciputulwa ca masambililo cili icaibukila nokwishiba amafya yamo-yamo ayaletumbuka muli uku kupilibula kwa masambililo mukutwala abasambi mukwishiba imilimo imo-imo iyo bafwile ukwishiba ukubomba. Ukulemba kwa ici citabo kulelangisha ukuipelesha kwa ciputulwa ca masambililo mukumona ukuti ubu bulendo bwakupilibula amasambililo bwaba ubwayanguka kuli bakafundisha ukupitila mukubalangilila ifyakufunda abasambi imilimo, ifyakwasha abasambi ukukonka ifilekabilwa muli ubu butantiko. Leelo nangula cingaba ifi, bakafundisha bali abacincishiwa ukulundapo imilimo imo-imo iyakufunda abasambi iishili muli ici citabo ukupitila mukufwailisha kwabo nokusalapuka kwabo pakutula bakwanisha ifilekabilwa kubasambi ilyo balefunda aya masambililo.

Kuli isubilo ilikalamba ilyakuti ici citabo cili nokwafwilisha bakafundisha ilyo balefunda abasambi muli ubu butantiko bupya ubwa Competence-Based Curriculum, ubulepakamisha ubuumi bwa basambi mukubapeela amasambililo ayalingana nemilimo ilekabilwa ukubombwa mubwikashi bwabo.

IFYO ICI ICITABO CIFWILE UKUBOMFIWA PAKUFUNDA

Muli ici citabo muli amasambillo ya Litalica mu Cibemba ayafwile ukufundwa mu temu 1. Aya masambillo yalyakanishiwa mumitwe elyo cila mutwe uli nefya kusambilila pamo nga: Intendekelo ya Cisambililo ca Litalica, Imisango ya Litalica lyalekana-lekana, Imilimo Litalica lbomba, elyo na Ukusambilila pali Litalica lyakulandafye. Ifyakusambilila ifyabiikwa muli ici citabo tafyapekanishiwa nga amasambillo yakufunda, leelo kuti fyabomfiwa mukupekanya amasambillo yakufunda cila bushiku ukupitila mukubuulamo ifyakufunda ukufuma muli cila mutwe pakupanga isambililo limo. Icilingililo, isambililofye limo kuti lyakwata ifikomo ifingi ifyakufunda muli iyi mitwe: Intendekelo ya Cisambililo ca Litalica, Imisango ya Litalica lyalekana-lekana, Imilimo Litalica lbomba, elyo na Ukusambilila pali Litalica lyakulandafye. Kanshi ilyo mulepekanya isambililo, mufwile ukusala ifikomo fyakufunda ifyo mulefwaya ukulolekeshapo pamo na imilimo nangula ifyakucita ifyo abasambi bafwile ukubomba pali cila mutwe ukulingana necilekabilwa ukwishiba. Eico kanshi isambililo limo kuti lyakwata ifilekabilwa ukwishiba ifingi ukucila pali cimofye.

INSHILA YAMIFUNDILE IYABIKWAMO

Lyonse ilyo mulefunda, mulingile ukubomfya nokukonka inshila shakufundilamo abasambi ishalekana-lekana. Kanshi kuti mwabomfya inshila shimo pali ishi:

- Ukupanga utusela (Role-play)
- Ukubomba imilimo yalekana-lekana ukupitila mukwangala utusela (play activities/ drama)
- Ukufwailisha ifishinka pamilandu iyalekana-lekana (Research)
- Ukusambilila ukupitila mukulanshanya (discussions)
- Ukusambilila ukupitila mukufwaya nokusanga ifishinka pamilandu iyalekana-lekana (discovery)
- Ukulemba utumalyashi utwiipi (short stories)
- Ukubomfya kompyuta mukupanga amalyashi, utusela nama poyemu

Ukulundapo, kuli notumisango utunsela-nsela natumbi utwamifundile uto kafundisha alingile ukubomfwa pakuti akwanishe ukufunda abasambi abalekana-lekana abasangwa mu kalasi intu afundamo. Bakafundisha baalishiba utu tunsela-nsela utwingi ukulingana nefyo baakanshiwa mumasambililo yabo kuma college.

IFILEKABILWA UKWISHIBA

SN	IFYAKWISHIBA	UBULONDOLOSHI
1	Ukwishiba ukusobolola nokwilula ifintu (Analytical Thinking)	<ul style="list-style-type: none"> • Ukusobolola na ukwilula ilyashi • Ukumfwa na ukwilula ifikope • Ukukonkelesha mufiunda • Ukwishiba ukuti ifilembo fiimininako ifiunda
2	Ukuba umwikala caalo (Citizenship)	<ul style="list-style-type: none"> • Ukwishiba na ukukonka amafunde
3	Ukulanshanya (Communication)	<ul style="list-style-type: none"> • Ukubomfya amashiwi ayayana mu nshila ishalekana-lekana • Ukwishiba ukumfwa, ukulanda. Ukubelenga na ukulemba • Ukwilula amashiwi ukubomfya ifishibilo • Ukwishiba ukulanda mu nshila iyampomfu • Ukupeela inshita kuli bambi ilyo mulelanshanya • Ukukwata ubwishibilo pa filembelwe • Ukumfwa kulyashi ilipeelwe
4	Ukutontonkanya mukushika	<ul style="list-style-type: none"> • Ukukwata ubwishibilo pa fipe ifyalekana-lekana

	(Critical Thinking)	<ul style="list-style-type: none"> • Ukwishiba na ukulumbula amashina ya fintu ifili mu ncende shabo • Ukwishiba ubwampano bwaba pa filembo na ifiunda
5	Ukwishiba ukubomfya kompyuta (Digital Literacy)	<ul style="list-style-type: none"> • Ukwishiba ukwapanya amaenso na iminwe ukubomfya ifipe fyansala
6	Ukuibaka mu maano (Emotional Intellegence)	<ul style="list-style-type: none"> • Ukwishiba ukuibaka nokusunga umutende
7	Ukubombela capamo (Collaboration)	<ul style="list-style-type: none"> • Ukubombela capamo nabambi mukufikilisha imilimo

UMUTWE 1: INTENDEKELO YACISAMBILILO CA LITILICA

Ubulondoloshi:

Muli uyu mutwe, abasambi balatendeka icisambililo ca Litilica. Balasambilila ubupilibulo bwa Litilica pakuti beshibe ifyo ici icisambililo cilolekeshapo. Isambililo lyalalondolola ubipilibulo bwa Litilica apo apali ukutantika ubupilibulo bwa Litilica ubwa lekana-lekana elyo na ukulondolola cila bupilibulo ubupeelwe. Nakabili, abasambi balabebeta ubupilibulo bwa Litilica ubwa lekana-lekana ukupifila mukubebeta ubupilibulo, ukupalanya na ukupusanya ubupilibulo bwa lekana-lekana elyo na ukulengulula ubupilibulo bwa lekana-lekana. Teico ceka, abasambi balaipangila abene ubupilibulo bwa ishiwi lya Litilica na ukulanga ifyo ubo ubilibulo bwinga suntinkanya ukulingana na icisambililo ca Litilica.

Umutwe Unoono 1: Ubupilibulo bwa ishiwi lya Litilica

Ubulondoloshi:

Muli uyu mutwe, abasambi balasambilila pabulondoloshi bwa ishiwi lya Litilica apo apali ubipilibulo bwa ici cisambililo ukubikapofye na ubulondoloshi bwa icisambililo ca Litilica ubwa pusana-pusana. Abasambi balatantika ubupilibulo bwa Litilica ubwa lekana-lekana elyo na ukulondolola umo cila bupilibulo bwalola

Ifilekabilwa Ukwishiba: Abasambi balekabilwa ukwishiba ubupilibulo bwa Litilica

Ifikomo fyakufunda:

- Ukwishiba ubipilibulo bwa Litilica
- Ukutantika ubupilibulo bwa Litilica ubwa lekana-lekana
- Ukulondolola ubipilibulo bwa Litilica ubwa lekana-lekana

Icishibisho kuli Kafundisha:

Kafundisha umone ukuti abasambi baishiba ukulondolola ubupilibulo bwa Litalica, batantinke ubupilibulo bwa Litalica ubwa lekana-lekana elyo bapeele na ubulondoloshi bwa cila bupilibulo ubupeelwe

Ifyakubomfya pakufunda: Ifitabo, bamagazine, amapepala yalyashi

Ifyakucita:

Abasambi bafite ukupeela nokutantika ubupilibulo bweshwiya lya Litalica

1. Kafundisha:

- Eba abasambi batantike ubupilibulo bwa Litalica ubwa lekana-lekana

Ifilangililo fya bupilibulo bwa Litalica:

- i. Litalica ninshila imo iyo tupokelamo amalyashi ayalekana-lekana ukupitila mukulanda na ukulemba
- ii. Litalica musango wakusungilamo imbeela sha buntunse pakuti ubumi bwa muntu bube ubwafikapo kabili ubwakanshiwa mubutukushi
- iii. Litalica musango umo uwakale-nakele nakabili walikokanyapo ukepeela amalango mubwikashi bwesu muncende umo twikala
- iv. Litalica cibombelo ico umuntunse abomfya ukupokelamo na ukupokelamo intambi ishikuma ku nkulo na inkulo
- v. Litalica nifyo fyonse ifitungilila intambi sha muntunse ifili nga inshimi na inyimbo
- vi. Litalica cilolani cabwikashi bwa muntu ico icilanga intambi shakwe, ifyo asuminamo na ifibelelo fyakwe

- vii. Litalica musango wafishibilo fya mibomfeshe yalulimi ifilanga ubupilibulo ilyo ululimi lwabofeshiwa mu micitile yonse iyabuntunse
 - viii. Litalica nimbeela imo iyo abantu bakwatamo ubutungwa bwakusosa, ukulemba pakutumbula ifili mukati ka mitima yabo
 - ix. Litalica ilolesha pabwikashi bwa muntu umwaba ukutemwa, ukufulwa ukulufya na ukupata, imbeela iisuma elyo na ifikumine ubwikashi bwa muntu
 - x. Litalica ni mbela imo iilanga ubwikashi bwa muntu nangula umutundu wakwe, imitotokanishishe yakwe elyo na imilimo acita mubwikashi bwakwe
- Ishi enshila shimo-shimo isho wingalondolwelamo ubupilibulo bweshiwi lya litalica
 - Tulingile ukwishiba ukuti kuli inshila nashimbi ishalondolola ubupilibulo bweshiwi lya litalica ukucila pali ishi tutantike muli ici citabo
 - Eba abasambi balondolole ubipilibulo bwa Litalica ubwa lekana-lekana
 - Bafwailishe mufitabo nafimbi umwalola ishiwi lya litalica
 - Eba abasambi ubupilibulo bwa Litalica ubwafikapo

2. Abasambi:

- Abasambi batantike ubipilibulo bwa Litalica ubwa lekana-lekana
- Abasambi balondolole ubipilibulo bwa Litalica ubwa lekana-lekana

- Peela abasambi ubupilibulo bwa Litilica ubwafikapo

Imibombele ileenekelwa

- Ubupilibulo bweshiwi Iya Litilica ubwa lekana-lekana bwalondololwa mukufikapo

Ukusapawila

- Abasambi basambilila pabulondoloshi bwa Litilica apo apali ubipilibulo bwa ici cisambililo ukubikapofye na ubulondoloshi bwa icisambililo ca Litilica ubwa pusana-pusana. Abasambi batantika ubupilibulo bwa Litilica ubwa lekana-lekana elyo na ukulondolola umo cila bupilibulo bwalola.

Ukwesha abasambi

1. Pabulondoloshi bwa Litica bupelwe, salapo bumo ubo ulemona ukuti nabufikapo ukupwililika elyo ulondololele ico wabusalila ukuti buli ubwapwililika.
2. Pabulondoloshi bwa Litica bupelwe, salapo bumo ubo ulemona ukuti tabufikelepo elyo ulondololele ico wabusalila ukuti buli tabufikelepo.

Umutwe Unoono 2: Ukusobolola Ubupilibulo bwa Litalica ubwa lekana-lekana

Ubulondoloshi:

Muli uyu mutwe, abasambi balasambilila pabupilibulo bwa Litalica ubwa lekana-lekana mukufikapo ukupitila mukusobolola ubupilibulo, ukupalanya na ukupusanya ubupilibulo bwa lekana-lekana elyo na ukulengulula ubupilibulo bweshiwi Iya litalica ubwa lekana-lekana.

Ifilekabilwa Ukwishiba: Abasambi balekabilwa ukusobolola ubupilibulo bwa Litalica ubwa lekana-lekana

Ifikomo fyakufunda:

- Ukubebeta ubupilibulo bwa Litalica ubwa lekana-lekana
- Ukupalanya na ukupusanya ubupilibulo bwa Litalica ubwa lekana-lekana
- Ukulengulula ubupilibulo bwa Litalica ubwa lekana-lekana

Icishibisho kuli Kafundisha:

Kafundisha mona ukuti abasambi baishiba ukusobolola ubupilibulo bwa Litalica ubwa lekana-lekana., bapalanya na ukupusanya ubupilibulo bwa Litalica ubwa lekana-lekana elyo bapeele na ubulondoloshi bwa cila bupilibulo bupeelwe.

Ifyakubomfya pakufunda: Ifitabo, bamagazine, amapepala ya Ilyashi, Dikishonali

Ifyakucita:

Abasambi bafwile ukulondolola ubupilibulo bweshiwi lya Litalica

1. Kafundisha:

- Eba abasambi babebete ubupilibulo bwa Litalica ubwa lekana-lekana
- Eba abasambi bapalanye na ukupusanya ubupilibulo bwa Litalica ubwa lekana-lekana
- Eba abasambi balengulule ubupilibulo bwa Litalica ubwa lekana-lekana

Ifilangililo fya bupilibulo bwa Litalica:

- i. Litalica ninshila imo iyo tupokelamo amalyashi ayalekanalekana ukupitila mukulanda na ukulemba

Ubu ubupilibulo bulifye bwino pantu nabulanda pali Litalica yakulandafye na iyalembwa nga imisango ibili iyakwata ici icisambililo lelo ilumbwilefye amalyashi nga ifintufye ifyabamo fyeka

- ii. Litalica musango wakusungilamo imbeela sha buntunse pakuti ubumi bwa muntu bube ubwafikapo kabili ubwakanshiwa mubutukushi

Ubu ubupilibulo bulifye bwino pantu bwalanda pabutukushi na imbeela sha buntunse lelo tailondolwele imbali shonse isha Litalica apali litalica iyalembwa

- iii. Litalica musango umo uwakale-nakele nakabili walikokanyapo ukepeela amalango mubwikashi bwesu muncende umo twikala

Ubu ubupilibulo nabufikapo pantu bulelanda pabukankala bwa ntambi shakale lelo ubwafya ubu ubipilibulo bukwete bwakuti intambi shimo shaliloba kabili kwishile shimbi ishipya

- iv. Litalica cibombelo ico umuntunse abomfya ukupokelamo intambi ishikuma ku nkulo na inkulo

Ubu ubupilibulo bwakoselela pantambi lelo muli Litalica tulasambililamo nafimbi ifintu ifingi apali ukwishiba imilembele isuma, ukukampusha imitontonkanishishe elyo nafimbipo

- v. Litalica nifyo fyonse ifitungilila intambi sha muntunse ifili nga inshimi na inyimbo

Ubu ubupilibulo nabufikapo lelo inshimi na inyimbo tefibombelo fyekafye iyo. Kwalibako na amapinda, utunyongandimi na insoselo. Ifi fyonse, fisangwa mu Litalica

- vi. Litalica cilolani ca bwikashi bwa muntu ico icilanga intambi shakwe, ifyo asuminamo na ifibelelo fyakwe.

Ubu ubupilibulo tabuli ubwapwililika pantu intambi shimbi shili shakwampulafye tashili shesu iyo

vii. Litalica nimbeela imo iyo abantu bakwatamo ubuntungwa bwakusosa, ukulemba na ukutumbula ifili mukati ka mitima yabo

Ubusuma bwa ubu ubupilibulo buli mweitontokanyo lya buntungwa na amaisosele lelo nabobwine nabushako fimo ifipalile nga intambi, amalangi, ifishilano elyo nafimbi

viii. Litalica ilolesha pabwikashi bwa muntu umo umwaba ukutemwa, ukufulwa ukulufya na ukupata, imbeela iisuma elyo na ifikumine ubwikashi bwa muntu.

ix. Litalica ni mbeela imo iilanga ubwikashi bwa muntu nangula umutundu wakwe, imitotokanishishe yakwe elyo na imilimo acita mubwikashi bwakwe

2. Abasambi

- Babebete ubipilibulo bwa Litalica ubwa lekana-lekana
- Bapalanye na ukupusanya ubipilibulo bwa Litalica ubwa lekana-lekana
- Babebete nokumonamo ubusuma nangula ubukankala ubuli muli ubu bupilibulo bwa Litalica
- Balengulule ubipilibulo bwa Litalica ubwa lekana-lekana

Imibombele ileenekelwa

Ubupilibulo bwa Lilitica ubwa lekana- lekana bwabebetwa bwino- bwino ukupitila mukutasha nokulengulula

- Ubupilibulo bwa Lilitica ubwa lekana-lekana bwapalanishiwa na ukupusanishiwa mukufikapo
- Ubupilibulo bwa Lilitica ubwa lekana-lekana bwalengululwa mukufikapo

Ukusapawila

Abasambi basambilila pabupilibulo bwa Lilitica ubwa lekana-lekana mukufikapo ukupitila mukusobolola ubupilibulo, ukupalanya na ukupusanya ubupilibulo bwa lekana-lekana elyo na ukulengulula ubupilibulo bwa lekana-lekana

Ukwesha abasambi

1. Palanya na ukupusanya ubupilibulo bwa lekana-lekana ubwa lilitica
2. Pabulondoloshi ubwa Lilitica bupeelwe, bulapo bubili ubulengulule mukufikapo

Umutwe Unoono 3: Ukupanga Ubupilibulo bwa Litalica

Ubulondoloshi:

Muli uyu mutwe, abasambi balapanga ubupilibulo bwa Litalica ubwa lekana-lekana. Balabomfya ubwishibilo bwabo na ukuipangila ubulondoloshi bwa Litalica. Pakupanga ubu ubulondoloshi, abasambi balalanga ifyo ubupilibulo bapele bwinga suntinkana na ubipilibulo bwine-bwine ubwa Litalica.

Ifilekabilwa Ukwishiba: Abasambi balekabilwa ukuipangila ubupilibulo bwa Litalica ubwabo

Ifikomo fyakufunda:

- Ukuipangila ubipilibulo bwa Litalica
- Ukulanga ifyo ubipilibulo bwa Litalica ubwakuipangila bwinga suminishiwa

Icishibisho kuli Kafundisha:

Kafundisha umone ukuti abasambi baipangila ubupilibulo bwa Litalica kabili balanga ifyo ubipilibulo bwa Litalica ubwakuipangila bwinga suminishiwa

Ifyakubomfya pakufunda: Ifitabo, bamagazine, amapepala ya ilyashi, Dikishonali

Ifyakucita:

Abasambi bafwile ukwishiba ukuipangila ubupilibulo bwa Litalica abene

1. Kafundisha

- Londolwela abasambi ifyo ubupilibulo bwa Litalica bwingapangwa

- Pamo nabasambi pangenipo ubupilibulo bumo ubwa Litifilica
- Eba abasambi baipangile ubipilibulo bwa Litifilica
- Eba abasambi balange ifyo ubipilibulo bwa Litifilica ubwakuipangila bwinga suminishiwa mukupalanya na ukupusanya na ubipilibulo bwa Litifilica ubwa lekana-lekana

2. Abasambi

- Baipangile ubipilibulo bwa Litifilica
- Balange ifyo ubipilibulo bwa Litifilica ubwakuipangila bwinga suminishiwa ukupitila mukupalanya na ukupusanya na ubipilibulo bwa Litifilica ubwa lekana-lekana

Imibombele ileenekelwa

- Ubupilibulo bwa Litifilica bwapangwa mukufikapo
- Ukusuminisha ukupalanya na ukupusanya ubipilibulo bwa Litifilica ubwa lekana-lekana na ubipilibulo bwa Litifilica ubwakuipangila kwacitwa bwino-bwino

Ukusapawila

Abasambi basambilila ifyakupanga ubupilibulo bwa Litifilica ubwa lekana-lekana. Balabomfya ubwishibilo bwabo na ukuipangila ubulondoloshi bwa Litifilica. Abasambi balanga ifyo ubupilibulo bapeele bwinga suntinkana na ubipilibulo bwine-bwine ubwa Litifilica

Ukwesha abasambi

1. Panga ubulondoloshi bobo ubwa Litalica ukulingana na ifyo usambilile
2. Langa ifyo ubulondoloshi bobo ubwa Litalica bwinga suminishiwa ukukonka ififwaikwa mubulondoloshi

UMUTWE 2: IMISANGO YA LITILICA

Ubulondoloshi

Muli uyu mutwe, abasambi balasambilila pamisango ibili iya Litilica apali, Litilica yakulandafye na Litilica iyalembwa. Muli Litilica iyakulandafye, abasambi balalondolola ubupilibulo bwa ulu ulubali lwa Litilica. Balaishiba Litilica yakulandafye umu abela elyo balabiika Litilica yakulandafye mumabumba ukulingana na imbeela na ukuilondolola umu yalola. Nakabili, abasambi balalondolola ubupilibulo bwa Litilica iyalembwa. Balaishiba Litilica yalembwa umu abela elyo balabiika Litilica yalembwa mumabumba ukulingana na imbeela na ukuilondolola umu yalola

Umutwe Unoono 1: Litilica iyakulandafye

Ubulondoloshi

Muli uyu mutwe, abasambi balasambilila pali Litilica iyakulandafye, balalondolola ubupilibulo bwa Litilica yakulandafye ubwa lekana-lekana. Pamulandu wakutila Litilica aba apengi, abasambi balaishiba Litilica yakulandafye umu abela ukulingana na ifyo alandapo. Ico Litilica yaba apengi, abasambi balabiika iyi Litilica yakulandafye mumabumba ukulingana na imbeela yaiko. Mukulekelesha, abasambi balalondolola umu Litilica yakulandafye yalola

Ifilekabilwa Ukwishiba: Abasambi balekabilwa ukulanshyana pali Litilica yakulandafye

Ifikomo fyakufunda:

- Ukuilondolola ubupilibulo bwa Litilica yakulandafye
- Ukwishiba umu Litilica yakulandafye yalola

- Ukubiika Litalica yakulandafye mumabumba ukulingana na imbeela
- Ukutantika imisango ya Litalica yakulandafye ukukonka na imbeela
- Ukulondolola Litalica yakulandafye umu yalola

Icishibisho kuli Kafundisha:

Kafundisha umone ukuti abasambi balondolola ubupilibulo bwa Litalica yakulandafye, baishiba ukubiika elyo na ukutantika Litalica yakulandafye ukukonka na imbeela yaiko

Ifyakubomfya pakufunda: Ifitabo, bamagazine, amapepala ya ilyashi, Dikishonali

Ifyakucita:

Abasambi bafwile ukulondolo ifyo Litalica yakulandafye yaaba

1. Kafundisha:

- Londolwela abasambi umwalola Litalica yakulandafye
- Eba abasambi balondolole ubupilibulo bwa Litalica yakulandafye
- Eba abasambi balange ubipilibulo bwa Litalica yakulandafye
- Eba abasambi babiike Litalica yakulandafye mumabumba ukulingana na imbeela
- Eba abasambi batantike imisango ya Litalica yakulandafye ukukonka na imbeela

2. Abasambi:

- Balondolole ubipilibulo bwa Litalica yakulandafye
- Balange ubipilibulo bwa Litalica yakulandafye
- Babiike Litalica yakulandafye mumabumba ukulingana na imbeela
- Batantike imisango ya Litalica yakulandafye ukukonka na imbeela

Imibombele ileenekelwa

- Litalica yakulandafye yalondololwa ukufikapo
- Imisango ya Litalica yakulandafye yabiikwa mumabumba bwino-bwino
- Imbeela ya imsiango ya Litalica yakulandafye yatantikwa bwino-bwino
- Litalica yakulandafye yalondololwa ifyo ifwile ukuba

Ukusupawila

Abasambi basambilila ubupilibulo bwa Litalica yakulandafye. Baishiba Litalica yakulandafye umu abela elyo balabiika Litalica yakulandafye mumabumba ukulingana na imbeela na ukuilondolola umu yalola

Ukwesha abasambi

1. Mumashiwi yobe, bushe Litalica yakulandafye cinshi?
2. Peela amabumba ya Litalica yakulandafye elyo uyalondolole mukushika?
3. Lumbulapo imibele ya Litalica yakulandafye isano?

Umutwe Unoono 2: Litolica iyalembwa

Ubulondoloshi:

Muli uyu mutwe, abasambi balasambilila pali Litolica iyalembwa, balalondolola ubupilibulo bwa Litolica iyalembwa. Balaishiba Litolica yalembwa umo abela elyo balabiika Litolica yalembwa mumabumba ukulingana na imbeela na ukuilondolola umo yalola

Ifilekabilwa Ukwishiba: Abasambi balekabilwa ukulanshanya pali Litolica iyalembwa

Ifikomo fyakufunda:

- Ukuilondolola ubupilibulo bwa Litolica iyalembwa
- Ukwishiba umo Litolica iyalembwa yalola
- Ukubiika Litolica iyalembwa mumabumba ukulingana na imbeela
- Ukutantika imisango ya Litolica iyalembwa ukukonka na imbeela
- Ukuilondolola Litolica iyalembwa umo yalola

Icishibisho kuli Kafundisha:

Kafundisha umone ukuti abasambi balondolola ubupilibulo bwa Litolica iyalembwa, baishiba, ukubiika elyo na ukutantika Litolica yalembwa ukukonka na imbeela yaiko

Ifyakubomfya pakufunda: Ifitabo, bamagazine, amapepala ya ilyashi, Dikishonali

Ifyakucita:

Abasambi bafwile ukwishiba ubupilibulo bwa Litolica iyalembwa

1. Kafundisha

- Londolwela abasambi ubupilibulo bwa Litalica iyalembwa
- Eba abasambi balondolole ubipilibulo bwa Litalica iyalembwa
- Eba abasambi balange ubipilibulo bwa Litalica iyalembwa
- Eba abasambi babiike Litalica iyalembwa mumabumba ukulingana na imbeela
- Eba abasambi batantike imisango ya Litalica iyalembwa ukukonka na imbeela

2. Abasambi

- Balondolole ubipilibulo bwa Litalica iyalembwa
- Balange ubipilibulo bwa Litalica iyalembwa
- Babiike Litalica iyalembwa mumabumba ukulingana na imbeela
- Batantike imisango ya Litalica iyalembwa ukukonka na imbeela

Imibombele ileenekelwa

- Litalica iyalembwa yalondololwa ukufikapo
- Litalica iyalembwa yaishibikwa bwino-bwino
- Imisango ya Litalica iyalembwa yabikwa mumabunda bwino-bwino

- Imbeela ya insiango ya Litalica iyalembwa yatantikwa bwino-bwino

Ukusapawila

Abasambi basambilila ubupilibulo bwa Litalica iyalembwa. Baishiba Litalica walembwa umo abela elyo balabiika Litalica iyalembwa mumabumba ukulingana na imbeela na ukuilondolola umo yalola

Ukwesha abasambi

1. Mumashiwi yobe, bushe Litalica yalembwa cinshi?
2. Peela amabunda ya Litalica yalembwa elyo uyalondolole mukushika?
3. Lumbulapo imibele ya Litalica yalembwa isano?

Umutwe Unoono 3: Ubupusano na Ukupalana kwaba pakati ka Lilitica Yakulandafye na iyalembwa

Ubulondoloshi

Muli uyu mutwe, abasambi balasambilila ubupusano na ukupalana kwaba pakati ka Lilitica yakulandafye na iyalembwa. Balantantika ukupalana kwaba pakati ka Lilitica yakulandafye na iyalembwa. Nakabili, balantantika imipusanine yaba pakati ka Lilitica yakulandafye na iyalembwa.

Ifilekabilwa Ukwishiba: Abasambi balekabilwa ukupalanya na ukupusanya Lilitica yakulandafye na iyalembwa

Ifikomo fyakufunda:

- Ukwishiba ubupusano bwaba pali Lilitica yakulandafye na iyalembwa
- Ukwishiba ukupalana kwaba pali Lilitica yakulandafye na iyalembwa
- Ukwishiba ubukankala bwa Lilitica yakulandafye na iyalembwa

Icishibisho kuli Kafundisha:

Kafundisha umone ukuti abasambi batantika ubupusano na ukupusana kwaba pakati ka Lilitica yakulandafye na iyalembwa kabili bandolole ubukankala bwafiko

Ifyakubomfya pakufunda: Ifitabo, bamagazine, amapepala ya ilyashi, Ing'oma, imitolilo, pintu na icisekeseke, utulimba elyo na ifitenge

Ifyakucita:

Abasambi bafwile ukwishiba ubusano bwaba pali Litifilica yakulandafye elyo na Litifilica iyalembwa

1. Kafundisha

- Londolwela abasambi ubupusano bwaba pali Litifilica yakulandafye neyalembwa
- Eba abasambi batantike ubupusano bwaba pakati ka Litifilica iyakulandafye na iyalembwa

Icilangililo;

- i. Yonse imisango ibili ikuma kumikalile yabantu
 - ii. Mumisango yonse abantunse balasuminamo
 - iii. Imisango yonse kuti yaba pafyacitike nangula ifyakwelenganyafye
 - iv. Imisango yonse ibili yakufundilamo, ukwebaula, ukusekesha ukwimuna ubulanda, amapepo, yukusoka, ukupanda amano, ukucankilwamo nafimbipo
- Eba abasambi batantike ubupusano bwaba pakati ka Litifilica yakulandafye na iyalembwa

Ifilangililo:

- i. Litifilica yakulandafye isabankanishiwa na mashiwi ya kulandafye elyo litilica yalembwa yena isangwa mufitabo, mumapepala yalyashi, pamwela, ba magazini elyo na ifipampa fya kaulaula
- ii. Litifilica yakulandafye kubomfya akanwa namatwi elyo na ifilangililo fya kuminwe na kumeenso elyo

Litilica yalembwa ibomfya ameenso elyo na ukupampanta kuminwe maka-maka kuli abo abashimona

iii. Litilica yakulandafye yalyanguka ukulondolola na ukwishibikwa bwangu pantu uuli onse kuti alondolola atemwa ukwimba elyo Litilica yalembwa yalikhwata apakupelela talondololwa saana kanofye umwine uwamulembele. Teapo peeka umuntu nga taishiba kubelenga tekuti amufwe umo alolele

- Eba abasambi balanshyanye pabukankala bwa pali Litilica yakulandafye na iyalembwa

2. Abasambi

- Batantike imipalanine yaba pakati ka Litilica yakulandafye na iyalembwa
- Batantike ubupusano bwaba pakati ka Litilica yakulandafye na iyalembwa
- Balanshyanye pabukankala bwa pali Litilica yakulandafye na iyalembwa

Imibombele ileenekelwa:

Ubupusanona imipalanine yaba pakati ka Litilica yakulandafye na iyalembwa yatantikwa mukufikapo

Ukusupawila:

Abasambi basambilila ubupusano nokupalana kwaba pakati ka Litilica yakulandafye na iyalembwa. Bantantika imipalanine yaba pakati ka Litilica yakulandafye na iyalembwa. Nakabili,

bantantika imipusanine yaba pakati ka Litalica yakulandafye na iyalembwa.

Ukwesha abasambi

1. Peela ubupusano bwaba pakati ka Litalica yakulandafye na iyalembwa
2. Peela imipalanine yaba pakati ka Litalica yakulandafye na iyalembwa.
3. Peela ubukankala bwa Litalica yakulandafye na iyalembwa

UMUTWE 3: IMILIMO LITILICA IBOMBA

Ubulondoloshi:

Muli uyu mutwe, abasambi balaishiba umulimo icisambililo ca litilica cibomba, ico icaba mumbali shibili, mukulandafye na mukulemba. Abasambi balaishiba intambi shabo na intambi shabantu bambi, ukubomfya imilumbe, amapinda, insoselo elyo nafimbipo. Nakabili, abasambi balaishiba umulimo ubomba Litilica iyalembwa. Mubwiipi, abasambi balaishiba inshila iyo ifikolwe fyesu fyalebomfya mukufunda mukusoka na ukutasha ukufuma kunkulo yakale ukufika nakunkulo yaleelo pakuti ulutambi lwa I cibemba na ubuntunse fitwalilile ukwabula ukuloba

Teapo peeka, abasambi balasambilila ukwishiba ukuti ilyashi lyonse iyalembwa elyo na iyakulandafye lyalikwata ifunde nangula ubupilibulo ubukankala kubwikashi bwamuntu muncende umo twikala. Nakabili cilabafwako ukusambilila ifintu ifingi ifyo ifingabafwako mubwikashi elyo namukukula kwabo pakuti babe abaana abakatiina kufyesonde ifyo ifinga baletela amafya muncende umo baleikala. Ecalenga umusambi onse uulesambilila Litilica afwile ukuitalusasha kufintu fimo ifinga muletela amafya mubumi bwakwe. Nakabili abasambi bonse balingile ukwishiba ukuti muli ili isambililo mulasangwa imilandu iikalamba, imo iba iyacishinka elyo imo nayo iba iyakwelenganyafye. Esambililo limo umo abasambi bakeshibila ifyo abantu basunga ifishilano fyabo nangula ifibelelo fyabo

Umutwe Unoono 1: Litilica Yakulandafye

Ubulondoloshi:

Muli ici ciputulwa, abasambi balasambilila ubupilibulo bwa Litilica yakulandafye elyo na ifisangwamo apo apali ukulanda amalyashi,

ukushimika inshimi, utucoleko, utonyongandimi, ukupanga utusela, ukushika na ukwimba inyimbo elyo na ukulanda imishikakulo

Ifilekabilwa Ukwishiba: Abasambi balatantika imilimo Litilica yakulandafye ibomba

Ifikomo fyakufunda:

- Ukwishiba ubupilibulo bwa Litilica yakulandafye
- Ukwishiba imilimo Litilica yakulandafye ibomba
- Ukupanga ilyashi lyakwelenganya ilikwete ifunde ilisuma
- Ukwishiba imibeele yaLitilica yakulandafye iyalekana-lekana

Icishibisho kuli Kafundisha:

Kafundisha umone ukuti abasambi baishiba ukushika inyimbo ishalekana-lekana, imishikakulo, ukupanga utusela nafimbipo

Ifyakubomfya pakufunda: Ifitabo, Ing'oma, imitolilo, pintu na icisekeseke, utulimba elyo na ifitenge

Ifyakucita:

Abasambi bafwile ukwishiba imilimo Litilica yakulandafye ibomba

1. Kafundisha

- Eba abasambi balumbule imilimo Litilica yakulandafye ibomba.
- Amasuko kuti yaba nga aya elyo nayambi ayapalileko:
 - i. Ukutwala abasambi pantanshi mukutasha na mukusansamusha
 - ii. Ukusalapula abasambi mumitontokanishishe iyafumaluka
 - iii. Ukulenga abasambi baishiba intambi shabo elyo na intambi shabantu bambi

- iv. Ukucishapo pamiishibile yalulimi lwabo
- v. Ilafunda abasambi ukukwata amaano yakwikalilamo nabantu bambi mumucinshi na mubufuma cumi

- Sobolola ifikomo fyaciine pamasuko yapelwe
- Eba abasambi balondolole imilimo Litalica yakulandafye ibomba (Amasuko kuti yaba nga aya elyo nayambi ayapalileko)

- vi. Ukutwala abasambi pantanshi mukutasha na mukusansamusha
Ici calola mukutila ilyo abasambi balesambilila Litalica yakulandafye, mulaba amalyashi ayengi ayo ayaba sansamusha pantu yalakuma kubwikashi bwabo

- vii. Ukusalapula abasambi mumitontokanishishe iyafumaluka
Ukupitlila muli Litalica yakulandafye, abasambi balasalapuka mumitontokanishishe na ukusanga amasuko ayasuma pamafya baleshingwana nayo

- viii. Ukulenga abasambi baishiba intambi shabo elyo na intambi shabantu bambi
Umutundu wabula intambi, walifwa. Eico, Litalica yakulandafye ilafunda abasambi ukwishiba intambi ishamutundu wabo ico icilenga ukuti babe abapusanako na abamutundu umbi pakuleeta icumfwano

- ix. Ilafunda abasambi ukukwata amaano yakwikalilamo nabantu bambi mumucinshi na mubufuma-cumi
- x. Lilitica wakulandafye alapeela amaano na ukusalapula abasambi pakuti baba abamucinshi elyo na bucishinka muli fyonse ifyo balecita

- Eba abasambi balondolole icalenga Lilitica yakulandafye ibe iikankala
- Eba abasambi balondolole imibomfeshye ya Lilitica yakulandafye mukupwisha amafya ayalekana-lekana ayali nga amafisakanwa, ubwafya bwa kucinja kwa mwela atemwa ukucinja yamiceele elyo na ifyamakwebo yakuisungilamo

Ilyashi/Inshimi

Muncende imo ifi, kwaliko imo intungulushi iyo batemenwe saana abantu. Iyi intungulushi, abantu balitemenwe nganshi na ukuicetekela apakalamba. Ici calengele konse uko yapitila, abantu bailepeela saana umucinshi pantu yaali iyamutembo, icikuuku elyo na ukuicefya. Ici ecalengele baipele icifulo icapamuulu mubuteko.

Kanshi iyi intungulushi, bailepeela ifintu ifingi icine-cine kuli bakateeka ifyakupeela abantu elyo na ukwafwilisha balya balebulisha. Leelo ngayabwelela kuncende yaiko, yaleeba abantu ukuti ubuteko tabumpa nangu cimo icakupeela abekala-caalo. Kanshi ifintu yalepeelwa ifyakufolesha abalanda, yaleshitisha pamutengo uukalamba icine-cine. Elyo ngakwamoneka ishancito, yalesendafye abalupwa elyo ukulipilisha abalefwaya

ukwingilako inctio ulupiya ulukalamba icine-cine. Iyi intungulushi, yalebepa bakateeka ukuti ifintu mumpeela apali ba motoka na ifigayo filafwilisha abantu mumushi.

Ubushiku bushilile kantu, Bakateka batumine cilolo wabuteeko kuncende ya ii ntungulushi ukuyamona ubuyantanshi. Icamupamba, tapali ico uyu cilolo asangile icabuya-ntanshi. Ilyo kwali ukufwailisha, casangilwe ukutila intungulushi yalebiikafye fyonse ifyo yalepeelwa mwitumba Iyaiko icalengele bakapokola ukuikata na ukuitwala ku cilye camilandu na ukukakwa imyaka iingi.

Ubulondoloshi:

Ili ilyashi ilya Litalica yakulandafye, liletufunda ukutiila ifintu fyacintu-bwingi fifwile fyabomfishiwa nabantu balekabila ukwafwiwa. Pantu kulaba ukufisopa nga fyapelwa. Bukaitemwe bulaleeta amafya ayapala insala, intulubundi elyo na umusebanya. Pali ili Iyaashi intungulushi yakana ukubomba nga intungulshi filya icibemba citila nankoko cifukatila abaana mumapindo. Ili Iyaashi liletusoka ukuti icishinka cisuma kabili lyatufunda ukuti ubufumfu-ntungu buubi bulaletelela.

Amapinda

- i. Ifyakulya ubushiku, fitulikila kumalushi

Ubulondoloshi:

Ilingi line, ifintu ificitika mubunfisolo nga amafisa-kwana, filesa mukwisa pabwelu

- ii. Mpombo wibilima, ababilima tabaya

Ubulondoloshi:

Abantu abacita amafisa-kanwa, balabutukila mukucita amafisa-kanwa pakutila bakwete bwangu-bwangu ifintu balefwaya. Leelo amafisakanwa yalaletelela

iii. Uwenda amainsa, taceba kumuulu

Ubupilibulo:

Ili ipinda lyalola mukucinja kwa mwela atemwa imyalukile yamiceele pamulandu wakuti imfula kuti yaloka inshitafye ili yonse amainsa eico umuntu onse afwile aipekanya mukubomba imilimo ukwabula ukulolesha kumuulu ukuti yalaloka

iv. Uwakana ukwela, akana na ukoca

Ubulondoloshi: Nga ifyo caishibibwa, Lilitica kuti twaibomfya mukufunda amakwebo yaikuitwalila pantanshi ukupilitila mumapinda nga ili ipinda ilatufunda pakubombesha

v. Uushibambila akanwa kakwe, akomfwa ukununka.

Ubulondoloshi: Umuntu ngatalebomba, takuli ifyo engabika mukanwa

i. Shimucita panoono, apokele mwikalafye umukashi

Ubulondoloshi:

Cawamapo ukubomba panono-panono ukucila ukwikalafye

- Aafwa abasambi ukutontonkanya mukushika elyo na ukubakampula mumikulile yabo

Icilangililo:

Umulumbe

Abantu baikela imishi iibili, umushi wa baice elyo na umushi wa bakalamba. Icalecitika cakuti mumushi wa baice nga mwapona ubusanso abakalamba tabaleyako mukumona ificitike. Leelo mu mushi wa bakalamba nga mwapona ubusanso abaice baleimafye bonse ukuyamona icicitike na ukwafwilishako pakuti bulya busanso bupwe

Bushe uyu mulumbe walola mwi?

Ubulondoloshi:

Umushi wa baice ulepilibula iminwe ikumi, elyo umushi wa bakalamba uleimininako ifikondo. Icilepilibula ukuti iminwe nga yakwata ubusanso ifikondo tafisa mukwafwilisha ubusanso bwa minwe leelo ifikondo nga fyakwata ubusanso iminwe ilema na ukwafwilisha kubusanso buli kufikondo

Ubwafwilisho tabufwile bwafinina kulubali lumo. Mucaalo tufwile ukulaafwana

- Eba abasambi bapange utusela elyo na ukutwangala ilyo ababiye baletamba

Akasela

(ukukonkonsha mu offeshi lyaba kafundisha mukalamba)

Kafundisha Mukalamba – “kalibu”

Mary Mulenga – “Mwapoleni bakafundisha mukalamba.”

Kafundisha Mukalamba – “Endita mune mwapola.”

Mary Mulenga – “Mukwai ndefwaya ukusoselela John Mutale ifyo ampumine muno lucelo.”

Kafundisha Mukalamba – “Ukukupuma! Mulandu nshi akupumine?”

Mary Mulenga – “Nico nalimusanga balepeepa ibange kunuma yafimbusu mailo, elyo namwebele nati nkakuseba kuli bakafundisha mukalamba. Kanshi leelo acelelefyeye ukunshoba na ukuntinya mpaka cafika na kukumpuma.”

Kafundisha Mukalamba – “ooh!! Bushe ni uyu wine John twatamfische uyu mulungu pamulandu wakutoba intolokoso?”

Mary Mulenga – “emukwai ni ulya wine.”

(kafundisha mukalamba aimya lanya ukwita bakafundisha ba Nsofwa ukuti bese ku offeshi)

Ba Nsofwa – “Mukwai mulenjita?”

Kafundisha Mukalamba – “Emukwai. Ndefwaya mundeteleko John Mutale mu 12B mwise nankwe.”

Ba Nsofwa – “emukwai natesha mukwai.”

(Bakafundisha ba Nsofwa baingila na umulumendo John Mutale mu offeshi lyakwa kafundisha mukalamba. John Mutale atankamanafye naingisha namaboko mutumba lyetoloshi lyakwe)

Kafundisha Mukalamba – “Bushe eiwe John Mutale?”

John Mutale – “Nusosa.”

Kafundisha Mukalamba – “Bakafundisha ba Nsofwa mwaumfwa umusalula kuli uyu mwana ilyo na umulandu taulatendeka ukulandwapo.”

Ba Nsofwa – “Ala mukwai ili lishiku pantu uyu mwana takwete umucinshi kubakalamba!”

Kafundisha Mukalamba – “Bushe John niwe upumine uyu mukashana?”

John Mutale – “Eee nine nkapumine pantu ka liule.”

Kafundisha Mukalamba – “Ico wasumina kuli uyu mulandu, kanshi nalakulembela kalata yakwita abafyashi bobbe pakuti bakese sangwako uko uyu mulandu ukaputulwa.”

- Eba abasambi balondolole ifyo Litalica yakulandafye yasunga intambi/ifishilano elyo na umusango fisabankanishiwilamo
- Eba abasambi balondolole inshila bengabomfya pakutwala icaalo cabo pantanshi ukubomfya Litalica yakulandafye

2. Abasambi:

- Balumbule imilimo Litalica yakulandafye ibomba
- Balondolole imilimo Litalica yakulandafye ibomba
- Balondolole icalenga Litalica yakulandafye ibe iikankala
- Balondolole imilimo Litalica yakulandafye ibomba mukupwisha amaafya ayalekana-lekana ayali nga amafisakanwa, ubwafya bwa climate change atemwa imyalukile yamicееe elyo na ifyamakwebo yakuisungilamo
- Balumbule amafunde yafwaikwa mubwikashi bwa muntu pakwikala bwino na bantu babiye
- Balumbule ifyo Litalica yakulandafye yaafwa abaana-kukula ukuba abamucinshi

Imibombele ileenekelwa

- Imilimo Litalica yakulandafye ibomba yatantikwa bwino-bwino
- Imilimo Litalica yakulandafye ibomba yalondololwa umwipwilapo
- Imilimo Litalica yakulandafye ibomba yasuminishiwa

- Ukulondola imilimo Litalica yakulandafye ibomba mukupwisha amaafya ayalekana-lekana yalondololwa bwino-bwino

Ukusupawila:

- Ili isambililo lyacikomaila pabukankala bwacisambililo ca Litalica ico icaba mumbali shibili, mukusosa na mukulemba. Ili isambililo nalifunda abasambi ukwishiba intambi shabo, na intambi shabantu bambi, ukubomfya imilumbe, amapinda, insoselo elyo nafimbipo. Teapo peeka iyo, abasambi nabeshiba inshila iyo ifikolwe fyesu fyalebomfya mukufumda, mukusoka na ukutasha ukufuma kunkulo yakale ukufika nakunkulo yaleelo pakuti ulutambi lwa Cibemba na ubuntunse fitwalilile ukwabula ukuloba. Nakabili ili isambililo nalilenga abasambi ukwishiba ifyo bengekala nabantu babiye mumushi ukwabula ukupusana, pantu balishiba intambi shabo elyo na ishababiye abamutundu umbi. Abasambi basambilila Litalica kabili balacishapo pafyo baishiba palulimi atemwa icitundu cabo.

Ukwesha abasambi

1. Tantika elyo ulondolole imilimo Litalica yakulandafye ibomba
2. Langa ifyo imilimo ibomba Litalica yakulandafye ingasuminishiwa
3. Fwailisha ifyo Litalica yakulandafye ibomba pakulolesha pamafya ayo tushingwana nayo

Umutwe Unoono 2: Litolica Yalembwa

Ubulondoloshi:

Muli uyu mutwe, abasambi balasambilila ubupilibulo bwa Litolica yalembwa elyo na ifisangwamo apo apali ututabo, amapepala yalyashi, bamagazine, ututabo twafikope, kaulaula wa pafipampa, umuntu ukulemba pankulo yakwe na iya umbi na ilyashi lisabankanishiwa pa mwela. Abasambi balatantika imilimo Litolica yalembwa ibomba ukubikapofye nokulondolola imilimo ine iyi. Abasambi balalanga na ifyo imilimo ibomba Litolica iyalekana-lekana inga sumininishiwa. Teapo peeka, abasambi balasambilila na ifyo Litolica yalembwa ibomfeshiwa mukubombela pakupwisha amaafya ayalekana-lekana ayali nga amafisakanwa, ubwafya bwa kucinja kwa mwela atemwa ukucinja kwamiceele elyo na ifyamakwebo yakuisungilamo.

Ifilekabilwa Ukwishiba: Abasambi balatantike imilimo Litolica yalembwa ibomba

Ifikomo fyakufunda:

- Ukwishiba ubupilibulo bwa Litolica yalembwa
- Ukwishiba imilimo Litolica yalembwa ibomba
- Ukupanga ilyashi lyakwelenganya ilikwete ifunde ilisuma
- Ukwishiba imibele ya Litolica yakulemba iyalekana-lekana

Icishibisho kuli Kafundisha:

Kafundisha umone ukuti abasambi baishiba ukulemba utushimi, utusela, inyimbo ishalekana-lekana, imishikakulo, amapinda na insoselo

Iyakubomfya pakufunda: Ifitabo, bamagazine, amapepala yalyashi

Iyakucita:

Abasambi bafwile ukutantika imilimo Litalica yalembwa ibomba

1. Kafundisha

- Eba abasambi balumbule imilimo Litalica yalembwa ibomba

Ifilangililo:

- ii. Litalica yalembwa ilasansamusha abasambi ilyo balebelenga ututabo

Icilangililo:

Ukufuma mukatabo **Nkobekela te cupo**

Mulenga alashimikila umukashana ifyo aendele. Ilyo apwa balalanda nelyashi limbi ilyo abene beshibe ilyakukosha icitemwiko cabo.

Ati, 'Taliana, bushe kwena naiwe nauntemwa ngefi ine nkutemenwe? Kabili nshilefwaya nakukulufya mumenso, kuti natemwa nokwikala nobe muno ng'anda mpaka umulungu ukupwa ukwabula nelyo kufumina panse tuleloleshanyafye.'

Taliana ati, 'Nga kuti walalyanshi muno mwine? Icishili cakupangila nakupangila.'

Mulenga ati, 'kuti twalalya ukutemwana; amenshi yakunwa ni kiss.'

Taliana ati, 'mukasosa.'

Mulenga ati, 'nkasosa nkasosa finshi? Ale asuka filya nkwapwiche, fikulu sana kuli ine.'

Taliana ati, 'bushe kanshi namunjipushapo nafimo? Finshi mwe?'

Mulenga ati, 'apa pene walaba?'

Taliana ati, 'kwena ine nalaba.'

Mulenga abwekeshapo ati, 'Ntile bushe nauntemwisha ngeefi naine nkutemwishishe?'

Taliana nao ati, 'Ntile shani pakwasuka?'

Mulenga ati, 'Ala kabili nkwasukile?' Newipwiche nine.'

- iii. Litalica yalembwa ilalenga abasambi ukusalapuka na ukutontonkanya mukushika
- iv. Litalica yalembwa ilafwilishako abasambi ukwishiba intambi ishabo elo nesha bantu bambi
- v. Litalica yalembwa ilankanshya abasambi ukukwata imibele isuma
- vi. Litalica yalembwa ilafwilisha abasambi ukwishiba ukulemba pankulo yabo na iyabambi

licilangililo pakulemba pankulo yandi

Nafyelwe mumwaka wa 1972 mumushi mwashi Mwaba Shi Musanse mu Caalo ca Mfumu ba Nsama Chipyoka. Taata aali ni Mwewa Kupa umwina Ng`umbo, Maayo aali ni Chansa wena aali Mutabwa.

Filya batila uwanga na ulupanga akafwa kulupanga, Taata alebombela pamumana muciputulwa cabuteeko icimona pesabi, kanshi abundilefye pamumana muli bamba wa Mwelu- wantipa.

Nantampile amasambililo yandi pasukulu pa Kampinda Primary School. Pamulandu wamfwa ya bataata, naliculile icine-cine mukusambilila kwandi pantu maayo taakweete apakuma ukuboko pamulandu wabupiina...

- Sobolola ifikomo ifyaciine pamasuko yapeelwe
- Eba abasambi balondolole imilimo Litalica yalembwa ibomba

Abasambi balondolole imilimo itantiikwe pamuulu umo yalola

- Eba abasambi balondolole icalenga Litalica yalembwa ibe iikankala
- Eba abasambi balondolole imibomfeshye ya Litalica yalembwafye mukupwisha amaafya ayalekana-lekana ayali nga amafisakanwa, ubwafya bwa climate change atemwa imicinjishe yamiceele elyo na ifyamakwebo yakuisungilamo
- Eba abasambi balondolole inshila Litalica yalembwa ingakampula imitontokanisha yabo pakuti babe abantungwa

2. Abasambi:

- Balumbule imilimo Litalica yalembwa ibomba
- Balondolole imilimo Litalica yalembwa ibomba
- Balondolole icalenga Litalica yalembwa ibe ikankaala
- Balondolole imilimo Litalica yalembwa ibomba mukupwisha amaafya ayalekana-lekana ayali nga amafisakanwa, ubwafya bwa climate change atemwa imyalukile yamiceele elyo na ifyamakwebo yakuisungilamo
- Balondolole inshila Litalica yalembwa ingakampula imitontokanisha yabo pakuti babe abantungwa

Imibombele ileenekelwa

Imilimo Litalica yalembwa ibomba mukupwisha amaafya ayalekana-lekana yatantikwa nokulondololwa bwino-bwino

Ukusupawila

- Muli ici ciputulwa, abasambi basambilila ubupilibulo bwa I Litalica yalembwa elyo na ifisangwamo apo apali ututabo, amapepala yalyashi, bamagazine, umuntu ukulemba pankulo yakwe na iya umbi na ilyashi ilisabankanishiwa pamwela nafimbipofye

Ukwesha abasambi:

1. Tantika elyo ulondolole imilimo Litalica yalembwa ibomba
2. Langa ifyo imilimo ibomba Litalica yalembwa ingasuminishiwa

- 3.** Fwailisha ifyo Litalica yalembwa ibomba pakulolesha pama fya ayo tushingwana nayo

UMUTWE 4: LITILICA YAKULANDAFYE

Ubulondoloshi:

Muli uyu mutwe, abasambi balaishiba ifyo Litalica yakulandafye yasuntikana na ubwikashi bwesu, balaceceta ifyo imbeela shantambi shitungilila Litalica yakulandafye. Balaishiba ubupilibulo bwafisolobelo fisangwa mu Litalica yakulandafye na ukupalanya ifi ifisolobelo ku maano yacifyalilwa. Kabili, abasambi balasambilila pamisango ya Litalica iyakulandafye, balafwaya imisango Litalica yakulandafye yabelamo apo apali utucoleko, amapinda, inshimi, inyimbo na imishikakulo. Teifyo fyeka, muli Litalica yakulandafye kuti mwasangwa nafimbi ifyapala imilumbe, utunyongandimi na amalango. Kabili Litalica yakulandafye tayabafye mumashiwi yalefuma mukanwa, leelo nakufishibilo fyakubomfya iminwe pakulanda maka-maka kubantu abo beta abati bankoma-matwi.

Umutwe Uunono 1: Intambi nga intuntuko yafisolobelo fya Litalica yakulandafye na iyalembwa

Ubulondoloshi:

Muli uyu mutwe, abasambi balasambilila uko Litalica yakulandafye yatuntukila. Balaceceta ifyo intambi shitungilila Litalica yakulandafye. Kabili, abasambi balaishiba ubupilibulo bwafisolobelo fisangwa mu litalica yakulandafye na ukupalanya ifi ifisolobelo kumaano yacifyalilwa.

Ifilekabilwa Ukwishiba: Abasambi baleenekelwa ukulanshanya pafisolobelo fya Litalica yakulandafye ukukonka na intambi

Ifikomo fyakufunda:

- Ukulanshyana ifyo ifisolobelo fya Litalica yakulandafye fyasuntikana na ubwikashi bwesu

- Ukulangilila ifyo Litalica yakulandafye yakuma kuntambi
- Ukwishiba intambi na ifishilano fyesu
- Ukulangilila ifyo amaano yacifyalilwa yasuntinkana na Litalica yakulandafye
- Ukulumbula ifibombelo ifyantambi
- Ukwishiba ifyo ifibombelo ifyantambi fibomfeshiwa mufisolobelo fya Litalica yakulandafye

Icishibisho kuli Kafundisha:

Kafundisha umone ukuti abasambi baishiba intuntuko yafisolobelo fya Litalica iyakulandafye iyo iyashimpwa muntambi

Ifyakubomfya pakufunda:

Ifitabo, Inyimbo, imishikakulo, amapinda, utulimba, ubunkolanya, imbaso, utusembe, iloba, inkasu nafimbipo

Ifyakucita:

Abasambi bafwile ukulanshanya pafisolobelo ifya Litalica yakulandafye

1. Kafundisha:

- Eba abasambi bapalanye ubwiskashi bwabo na ubupilibulo bwa nyimbo, amapinda na insoselo, amalyashi nafimbipo

Ifilangilillo;

i. Ulwimbo

Maayo aatile uko waya uko wikatuka bantu

Maayo aatile uko waya uko wikatuka bantu

Nangu lishilu niba wiso bonse niba noko

Nangu cipuba niba wiso bonse niba noko

Nangu bepipe niba wiso bonse niba noko

Abantu basuma bakakushika bakakutwala ku
manda

Ubupilibulo:

Ulu luwimbo, lulefunda umucinshi na icitemwiko.
Lulelanga ifyo inyimbo shingabomfeshiwa
pakufunda imibele isuma

ii. Amapinda

Akabangile kanwene ayalengama

Ubupilibulo:

Caliwama ukucincila mukubomba umulimo uonse.
Ili ipinda lilefunda ifyo umuntu afwile aba uwacincila
mubwikashi bwakwe nga ifintu fingamuwamina

iii. Insoselo

Namwelepete isembe lyamukuba

Ubupilibulo:

Emukutilla umuntu umunang'ani uushifwaya
ukubomba. Iyi insoselo ilefunda ukuti afwile
alebombesha tafwile ukuba umunang'ani.

iv. Amalango

Ibeseni

Kabonde we kabonde
We wangala nga inengo
We wankopyo nga mula
We wanuma nga ibeseni

Kabonde we kabonde

Wanenga kalaye noko
Neushalaile kumupampamina
Walenga nafilwa ukumona
Ukumona ilinso mwilamba lyamusana
Wanenga umukoshi wankoba
Newali na umukoshi wakapoli

Ubupilibulo:

Icikomo cakubalilapo cakuti, Ilango lilecenjisha abantu kubupulumushi maka-maka abalumendo abatemwisha banamaayo

- Kabonde- mutemwikwa wapa cani uyo ulupwa lwa mwaume lushaishiba. Ici icitemwiko tacilekonka intambi shacibemba
- Ingala na inkopyo-fileimininako abanakashi baciule
- Ibeseni- lilepilibula ubwanakashi
- Kalaye-noko- lilepilibula ubulwele bwakondoloka ubwa HIV/AIDS
- Ukumona ilinso mwilamba lya musana-cilepilibula ukonda icakuti na umushipi mumu sana ulefilwa ukukakilwa apo utupunda twakukofyamo tulemonekela pantu umuntu aondesha

- Wanenga umukoshi wankoba- cilepilibula ukonda
- Ukufwailisha ifyo imbeela shantambi shitungilila Lilitica yakulandafye

Icilangilillo:

i. Ubwinga

Ubwinga, nimbeela imo iyalutambi umo ifisolobelo fya Lilitica yakulandafye fibomfeshiwa ifili nga; inyimbo, amapinda, amalumbo, imishikakulo

2. Inyimbo

Kasambe umulume wecinangwa

Cibale cibale

Napanshi ulala wecinangwa

Cibale cibale

Ubupilibulo:

Namaayo afwile ukukwatila umulume umucinshi na ukusunga ing'anda yakwe ubusaka

- Eba abasambi ukulondolola ubupilibulo bwa ifibombelo ifyantambi ifibomfeshiwa mu Lilitica yakulandafye

Icilangilillo:

i. Ing'oma

Mu Lilitica yakulandafye, ing'oma tulaibomfya mu nyimbo

ii. Umondo

Umondo, cisolobelo ico babasa ukufuma ku cimuti, bafukula mukati mwashala icipunda elyo batula

ifipunda mumbali babiikapo na lemba-lemba
pafipunda pakuti ilyo umuntu auma umushimpo
pacimuti cafukulwa iciunda pamo nga icipangwa
ku ng'oma cilafuma

Umondo baubomfya kung'omba ilyo ilelumba
imfumu atemwa ilyo ilesoka abantu pakubatalusha
kumicitile ibi

- Eba abasambi balangilile ifyo amaano yacifyalilwa
yasuntinkana na Litolica yakulandafye

Icilangililo:

a) Amapinda

Ipinda ninsoselo shamanshoko ishikwata ubupilibulo
ubwashika

Icilangililo:

Akamana ukupooma, nipamabwe
Ipinda ili lyalola mukutifa ilyo uletungulula abantu
ufwile wakwata icikuuku pantu ukwabula abantu
tekuti ube imfumu. Mu Litolica yakulandafye,
amapinda yafunda imisango isuma

b) Imilumbe

Imilumbe ninshimi ishipi isho ishikwete ubupilibulo
ubufiseme mufisoselwe

Icilangililo:

- i. Umuntu aimine mumushi mumwakwe ukuya
kumishi imbi iyakutali ukuya mukunonka. Lilya
aleya, aipaya inama asusulako umutwe asha

abiika palupanda lwa cimuti akonkanyapo na ubulendo. Iyo alebwela kuntu aile, panuma ya mwaka iingi, asangile umutwe wanama pantu aubiikile ucilifye uubishi. Bushe umulumbe walola mwi?

Ubupilibulo:

Uyu umulumbe walola mukutula umulandu taubola icibola muntu. Umuntu alinga asha apwisha imilandu yonse elyo aya uko alingile ukuya pakuti ayaikala bwino ukwabula icakumusakamika

- ii. Kwali umuntu uwakwete nkalamo, imbushi na imimena. Ifi fyonse tafyelekwata ubwafya umwine nga epo ali. Uyu muntu aali pabulendo ubwakutali. Afikile pamumana apaali ubwato ubwali bwakwabushafye umuntu na icipe pamuku umo

Bushe, uyu muntu acitile shani pakwabusha fyonse ukwabula ubwafya? Nga aabuka na inkalamo, imbushi ileshala ilye imimena. Nga aabusha imimena nkalamo iliyela imbushi. Nomba aacitile shani pakwabuka umumana?

Uyu muntu, aabalilepo ukwabusha imbushi kaili abwekalamo mukwabusha inkalamo aitwala kwishilya uko ukwali imbushi. Nakabili ayabwela na imbushi aitwala kulya kwashele imimena elyo asenda iminena asha imbushi. Cilya ayabusha

imimena aisha na inkalamo elyo abwekelemo ukuyaabusha imbushi mukulekelesha.

c) Amalumbo

Amalumbo ninshila yakutashishamo ificitwa fya muntu atemwa Lesa pakwafwilisha ubwikashi bwa umuntunse

Icilangililo:

i. Ilumbo lyamfula

Katiti wakumbo shilwisusha imilonga imisombo yakwa Lesa aikwanshya

Chibulukutu walikupapwa mung'ombe; cifula mulilwa nabwangu bwakumutendwa

Wewakwilonga yampukutu bwakasenga, Mupeta shiloshi leeta ameenshi uleke tulye ubowa

Ubupilibulo:

Ili lumbo lyakutasha Lesa pamfula. Lilelanga ifyo umuntu limo-limo alalaba bwangu pafntu ifisuma ifyo Lesa aacita

3. Abasambi:

- Bapalanye ubwiskashi bwabo na ubupilibulo bwa nyimbo, amapinda na insoselo, amalyashi nafimbipo
- Bafwailishe ifyo imbeela shantambi shitungilila Litalica yakulandafye

- Balondolole ubupilibulo bwa ifibombelo ifyantambi ifibomfeshiwa mu Litalica yakulandafye
- Balangilila ifyo amaano yacifyalilwa yasuntinkana na Litalica yakulandafye

Imibombele ileenekelwa:

Ifyaba mufisolobelo fya Litalica yakulandafye fyalanshaniwapo nokusuntinkanishiwa kumaano yacifyalilwa umwipwilapo

Ukusapawila:

Abasambi baishiba ifyo Litalica yakulandafye yasuntikana na ubwikashi bwbo, baceceta ifyo imbeela shantambi shitungilila Litalica yakulandafye. Kabili, abasambi baishiba ubupilibulo bwafisolobelo fisangwa mu Litalica yakulandafye na ukupalanya ifi ifisolobelo kumaano yacifyalilwa

Ukwesha abasambi

1. Pangeni inyimbo ishilelanda pamikalile yacikaya
2. Lumbuleniko amapinda ayalanda pamucinshi na ayakusoka
3. Londololeni ifyo ifyakubumba na ifyakupanga-panga fyakuma kuli Litalica

Umutwe Unoono 2: Imisango ya Litolica yakulandafye

Ubulondoloshi:

Muli ici ciputulwa, abasambi balasambilila pamisango ya Litolica yakulandafye. Abasambi balafwaya imisango Litolica yakulandafye yabelamo apo apali utucoleko, amapinda, inshimi, inyimbo na imishikakulo

Ifilekabilwa Ukwishiba: Abasambi bafwile ukulanshanya pamisango ya Litolica yakulandafye

Ifikomo fyakufunda:

- Ukwishiba imisango ya Litolica yakulandafye
- Ukulondolola imisango ya Litolica yakulandafye
- Ukupeela ifilangililo fyamisango ya Litolica yakulandafye

Icishibisho kuli Kafundisha: Kafundisha umone ukuti abasambi baishiba, ubupilibulo na ukupeela ifilangililo fyamisango ya Litolica yakulandafye

Ifyakubomfya pakufunda: Ifitabo, Inyimbo, imishikakulo, amapinda, utulimba, ubunkolanya, imbaso, utusembe, iloba, inkasu nafimbipo

Ifyakucita:

Abasambi bafwile ukulanshanya pamisango ya Litolica yakulandafye

i.Kafundisha

- Eba abasambi batantike imisango ya Litolica yakulandafye

Ifilangilillo;

- Ificoleko
- Amapinda
- Utunyongandimi
- Utushimi
- Imilumbe
- Inyimbo
- Imishikakulo
- Amalumbo

- Eba abasambi balondolole cila musango wa Litalica yakulandafye

i. Ificoleko

Ificoleko cangalo icangalwa munshita yacungulo ico babomfya ukukampula imitontonkanishe yabantu. Kabili, ificoleko ninshila imo abakalamba beshibilamo umwaice uwakwata amaano nangula uwacenjela. Muli ici icangalo, kulaba ukwipushanya icipusho ukubomfya ishiwi 'Coo!' abaleasuka batila 'Ciise!

Icilangililo: Ing'anda iyabula umwinshi

Ubwasuko: liini

Icilangililo: Ukonali pali citatu

Ubwasuko: Mafwesa yapa mulilo

ii. Utunyongandimi

Miseela imo iyilembwa munshila imo iyaibela iyashupa pakulanda maka-maka ngailelandwa

mukwangufyanya

Icilangililo:

1. Uku ukulya kulya ulya, tekulya kulya, kano kulya kulya ulya,
ekulya kulya

 1. Cilemba mukulu mutongama paluputa
Cilemba mukulu mutongama paluputa
Cilemba mukulu mutongama paluputa
- Eba abasambi bapeele ifilangililo pali Litalica yakulandafye
 - Balande utunyongandimi

Icilangililo:

i. Inyimbo

- Inyimbo shacililo
- Inyimbo shacitemwiko
- Umupukumo atemwa inyimbo shimbwa mubwalwa
- Inyimbo shafikansa fyacaalo

ii. Amapinda

- Amapinda ayakusoka
- Amapinda ayakucincishya imilimo
- Amapinda yamucinshi
- Amapinda yakutununuka

ii.Abasambi

- Batantike imisango ya Litalica yakulandafye
- Balondolole cila musango wa Litalica yakulandafye

- Bapeele ifilangililo pali Litalica yakulandafye

Imibombele ileenekelwa

Imisango ya Litalica yakulandafye yaishibikwa nokulondololwa, nefilangililo fyapeelwa mukufikapo

Ukusupawila:

- Abasambi baishiba imisango ya Litalica yakulandafye. Nakabili, bafwaya nokwishiba umu imisango ya Litalica yakulandafye yabelamo apo apali utucoleko, amapinda, inshimi, inyimbo na imishikakulo

Ukwesha abasambi

1. Tantikeni imisango yabelamo Litalica yakulandafye
2. Londololeni ubupilibulo bwa cila musango wa Litalica yakulandafye
3. Peleni ifilangililo fya misango ya Litalica yakulandafye

BIBLIOGRAPHY

- Akombo. S, Karanja. B, Njoroge. L and Mukunga. M (2010) K.C.S.E: **Golden Tips English**. Nairobi: Moran Publishers.
- Asheli, N (2011) **Advanced Level Literature: An Essential Guide**. Dar es Salaam.
- Bukagile. G.R, Nyangwine. N, Yogo. M, Msabila. D.T and Mhilu. G.G (2008) **Advanced Level Literature: Theory of Literature, Novels, Plays, Poetry, Stylistics and Communication Skills**. Dar es Salaam: Nyambari Nyangwine Publishers
- Chanda VM (2002). **Introduction to the Study of Bantu Languages**. LAL 211 Batch 1. UNZA. Lusaka.
- Colston, H. L. (2015). **Using figurative language**. Cambridge University Press.
- Glucksberg, S. (2001). **Understanding figurative language: From metaphor to idioms**. Oxford University Press. Keraf, G. (2009). *Diski dan Gaya Bahasa* Jakarta: PT. Gramedia Pustaka Utama
- Mbwayu, J (2003). **Introduction to the Study of Poetry and Drama** E122 Batch 1. UNZA. Lusaka
- Ministry of Education (2024). *Literature in Zambian Languages Ordinary level Syllabus*. Curriculum Development Centre. Lusaka.
- Musonda B.L (2002). **Introduction to Literary Studies** LAL 221 Batch 1. UNZA. Lusaka
- Rasinski, T., Smith, M. C., & Zutell, J. (2017). **Go figure! Exploring figurative language, levels 2–4**.
- Savan & Grehan (1986). **Readings in Poetry**. Kenneth Kaunda Foundation. Lusaka.
- Shell Educational Publishing.
- Vulchanova, M., Milburn, E., Vulchanov, V., & Baggio, G. (2019). Boon or burden? **The role of compositional meaning in figurative language processing and acquisition**. *Journal of Logic, Language and Information*, 28, 359–387. doi:10.1007/s10849-019-09282-7

